



Sumáriu Kazu
Tribunál Judisiál Primeira Instáncia Suai
Mai 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instáncia Suai.

1. Totál kazu ne'ebé JSMP monitoriza :15

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	9
Artigu 177 KP	Abuzu seksuál ba menór	1
Artigu 172 KP no Artigu 23,24	Tentativa violasaun seksuál	2
Artigu 172 KP, Artigu 251 KP no Artigu 23,24 KP	Tentativa violasaun seksuál no furtu simples	1
Artigu 179 KP	Abuzu seksuál ba ema ne'ebé labele reziste	1
Artigu 316 KP	Kontra bandu	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Totál		15
--------------	--	-----------

2. Totál desizaun ne'ebé JSMP monitoriza:11

Tipu pena	Artigu	Númeru
Prizaun	66 KP	1
Suspensaun ba prizaun nia ezekusaun	68 KP	10
Totál		11

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun : 4

1. Krime abuzu seksuál ba menór

Nú. Prosesu : 0012/19 MFSIC

Kompozisaun Tribunál : Koletivu

Juis : Dr. Naason Mário A. M. Doutel, Dr Jose Maria de Araújo no
Dra. Patricia de Fatima Xavier

Prokuradór : Dr. Rafael Jeronimo Gusmão

Defeza : Dr. Angelmo Pinto

Desizaun : Pena prizaun tinan 12

Iha 18 Maiu 2023, Tribunál Judisiál Primeira Instánsia Suai prezide julgamentu leitura akordaun ba krime abuzu seksuál ba menór ne'ebé envolve arguidu MB hasoru lezada ho idade tinan 13, iha Munisípiu Manufahe.

Akuzasaun prokuradór

Prokuradór akuza katak iha 09 Agostu 2019, iha oras tuku 15:00 lokraik, arguidu ba iha lezada nia uma, haree lezada mesak iha uma, arguidu bolu lezada hodi dehan ba lezada *"haris ita rua ba uma leten toba tiha mak hau fó osan ba ó,"* nune'e lezada lao tuir arguidu too iha uma tuan, arguidu tama uluk ba uma laran no bolu lezada tama tuir arguidu, hafoin arguidu komesa kaer lezada nia liman sorin no dada lezada ba iha kuartu laran hodi kolu hotu lezada nia roupa, hafoin arguidu haruka lezada toba iha kama leten, arguidu komesa kaer lezada nia orgaun sensitivu no halo relasaun seksuál ho lezada, hafoin halo tiha relasaun seksuál ho lezada arguidu haruka lezada hatais fali lezada nia roupa no arguidu fó mós ho osan US\$5.00 ba lezada no dehan ba lezada katak *"labele fó hatene ama sira,"* nune'e lezada mós la fó hatene ba nia inan sira. Maibé liu tiha fulan ida lezada nia bin rona informasaun husi nia la'en no husu atu fó hatene ba lezada nia inan atu hanorin lezada labele sobu arguidu nia família. Ho nune'e lezada nia bin mós fó hatene ba lezada nia inan hodi husu tuir lezada kona-ba problema ne'e no lezada responde katak halo relasaun seksuál ho arguidu dala ida. Hafoin lezada nia inan ba konfirma tan ho arguidu no arguidu hatan katak loos duni halo duni relasaun seksuál ho lezada. Konsekuensia husi arguidu nian aktu ne'e lezada lakon nia virgen bazeia ba relatóriu husi PRADET.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 too tinan 20.

Produsaun ba prova sira

Iha prosesu julgamentu, arguidu deklara katak faktu ne'ebé akuza ba arguidu la loos hotu no arguidu deklara katak la ba bolu lezada no la halo relasaun seksuál ho lezada. Arguidu mós deklara liután katak la fó osan ba lezada no arguidu foin primeiravés mai hatan iha tribunál.

Alende ne'e, lezada kontinua konfirma faktu hotu iha akuzasaun no deklara katak iha akontesimentu ne'e tauk no la fó hatene ba ninia inan aman, maibé bainhira lezada nia bin nia katuas oan hatene no família sira komesa husu tuir mak lezada foin fó hatene ba nia inan katak halo duni relasaun seksuál dala ida ho lezada.

Testemuña CdC nu'udar lezada nia inan, depoimenta katak la iha kuñesimentu kona-ba problema ne'e, maibé hatene problema ne'e husi lezada nia bin, nune'e testemuña husu lezada no lezada deklara katak halo relasaun seksuál ho arguidu dala ida. Testemuña la satisfas ho arguidu nia aktu ne'e, nune'e testemuña ba husu tan arguidu no arguidu mós hatan katak halo relasaun seksuál dala ida ho lezada, la satisfas ho arguidu ninia hahalok ne'e nune'e testemuña ba hato'o keixa iha polísia.

Testemuña DdC nu'udar arguidu nia oan hili direitu nonook.

Testemuña FdCVN, nu'udar lezada nia bin no hanesan mós arguidu nia fetu foun depoimenta katak kazu ne'e akontese liu tiha fulan ida mak foin testemuña DdC fó hatene ba testemuña katak arguidu hakuak lezada, nune'e testemuña informa fali ba ninia inan no husu tuir arguidu ho lezada no sira deklara katak halo duni relasaun seksuál dala ida.

Alegasaun finál

Prokuradór haktuir katak, mezmú iha julgamentu arguidu nega faktu hotu iha akuzasaun, maibé iha parte seluk lezada kontinua konfirma faktu hotu iha akuzasaun no reforsa mós ho relatóriu médiku husi PRADET no testemuña sira nian depoimentu. Nune'e prokuradór konklui katak arguidu nia aktu ne'e priense duni elementu husi krime abuzu seksuál ba menór, tanba ne'e husu ba tribunál atu kondena arguidu ho pena prizaun tinan sanulu resin rua.

Entretantu defeza haktuir katak, iha perante julgamentu arguidu deklara katak la halo relasaun seksuál ho lezada tanba momentu ne'eba arguidu iha uma de'it ka la ba fatin ruma, maibé rona fali husi lezada no testemuña konfirma faktu, nune'e husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu hotu, tribunál prova katak arguidu komete duni krime abuzu seksuál ba menór hasoru lezada.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu iha krime ne'e, tribunál konklui prosesu ne'e no kondena arguidu ho pena prizaun tinan sanulu resin rua.

2. Krime ofensa ba integridade fízika simples ho natureza violénsia doméstika

Nú. Prosesu : 0006/22.ANHTB
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Nelson J.S. Magno
Defeza : Dr. Jonas Henrique da Costa
Desizaun : Pena prizaun fulan 3 suspende ba tinan 1

Iha 12 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JGdA hasoru nia feen, iha Munisípiu Ainaro.

Akuzasaun prokuradór

Prokuradór akuza katak iha 21 Dezembru 2022, iha oras tuku 8:00 dadeer, arguidu tuku dala ida iha lezada nia ulun, tebe dala ida iha lezada nia kanotak, basa dala ida iha lezada nia hasan no rasta lezada nia liman halo lezada monu ba rai, rezulta moras maka'as no lezada konsege ba halo tratamentu iha Sentru Saúde Nunumogue. Antes agresaun ne'e, arguidu ho lezada diskute malu kona-ba arguidu husu osan ba lezada atu ba joga *bola guling*, maibé lezada la fó osan. Ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun, arguidu deklara foin mak mai hatan iha tribunál, arrepende ona nia hahalok no promete sei la repete tan iha futuru.

Alende ne'e lezada mós kontinua konfirma faktu sira iha akuzasaun no deklara katak depoisde akontesimentu liu fulan rua mak arguidu ho lezada ho iniciativa rasik buka malu no di'ak malu, lezada haktuir katak depoisde akontese too agora arguidu la repete tan ninia hahalok ne'e.

Alegasaun finál

Prokuradór haktuir katak, arguidu provadu no presidente tuir faktu ne'ebé iha no arguidu mós konfesa no konfirma husi lezada, prokuradór haree katak krime violénsia doméstika aas tebes no atu halo prevensaun ba krime refere, husu ba tribunál kondena arguidu tuir konviksaun tribunál nian.

Entretantu defeza husu ba tribunál atu kondena arguidu ho pena ne'ebé adekuaudu ho konsiderasaun katak arguidu konfesa, arrepende ona nia hahalok, diak malu ona ho lezada no promete sei la komete tan krime hanesan iha futuru.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia ulun, tebe dala ida iha lezada nia kanotak, basa dala ida iha lezada nia hasan no rasta lezada nia liman halo lezada monu ba rai.

Bazeia ba faktu provadu sira ne'e tetu mós ho sirkunstánsia atenuante sira hanesan arguidu konfesa, arrepende ona nia hahalok, diak malu ona ho lezada no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

3. Krime ofensa ba integridade fízika simples ho natureza violénsia doméstika

Nú. Prosesu : 0003/21.BBATB
Kompozisaun Tribunál : Singulár
Juis : Dra. Patricia de Araujo F. B. M. Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 6 suspende ba tinan 1

Iha 15 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DdCT hasoru nia inan, iha Munisípiu Bobonaro.

Akuzasaun prokuradór

Prokuradór akuza katak iha 19 Marsu 2021, iha oras tuku 7:00 dadeer, arguidu buti dala ida iha lezada nia kakorok, riba lezada ba rai no kontinua sama lezada nia kelen parte karuk, arguidu nia aktu ne'e rezulta lezada sofre moras iha kakorok no kelen. Antes agresaun ne'e. Antes agresaun ne'e, arguidu lezada diskute malu kona-ba lezada husu ba arguidu nune'e "*ó mak keta rega gajolina ba hau nia fore rai ne'e karik*", ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa, konjuga ho artigu 2, 3(c) 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun, arguidu deklara katak depoisde akontesimentu ne'e rezolve ona tuir família no arguidu fó sala ona ba lezada ho valor US\$100.00, arguidu deklara katak arrepende ona ninia hahalok promete sei la repete ninia hahalok ne'e iha futuru.

Depoisde rona deklarsaun arguidu nian, prokuradór konsidera prova suficiente ona nune'e husu ba tribunál atu presinde deklarasaun husi lezada. Defeza laiha opozisaun

ba pedidu ne'e. Bazeia ba pedidu ne'e, tribunál presinde audisaun lezada nia deklarasaun.

Alegasaun finál

Prokuradór haktuir katak, arguidu konfesa faktu hotu no sira dame malu ona no arguidu fó sala ona ba lezada, maibé haree ba volume krime violénsia doméstika ne'ebé aas tebes no atu halo prevensaun ba krime refere, husu ba tribunál atu kondena arguidu ho pena prizaun fulan neen suspende ba tinan ida.

Enkuantu, defeza haktuir katak arguidu foin mak mai hatan iha tribunál, arrepende ona ninia hahalok no depoisde akontesimentu too agora la iha problema seluk, tanba ne'e husu ba tribunál atu aplika pena kmaan ba arguidu.

Desizaun

Depoisde avalia faktu hotu tribunál prova katak arguidu buti dala ida iha lezada nia kakorok, riba lezada ba rai no kontinua sama lezada nia kelen parte karuk, arguidu nia aktu ne'e rezulta lezada sofre moras iha kakorok no kelen.

Bazeia ba faktu provadu sira ne'e no tetu mós sirkunstánsia atenuante sira hanesan arguidu foin mak mai hatan iha tribunál, arrepende ona ninia hahalok no promete la halo tan krime hasoru lezada no ema seluk, nune'e tribunál konklui prosesu no kondena arguidu ho pena prizaun fulan neen suspende ba tinan ida.

4. Krime kontra bandu

Nú. Prosesu : 0069/22.BBMLV
Kompozisaun Tribunál : Koletivu
Juis : Dr. Jose Maria de Araujo, Dr. Nasson Mário Armindo
Marques Doutel no Dr. Samuel da Costa Pacheco
Prokuradór : Dr. Nelson J.S Magno
Defeza : Dr. Domingos dos Santos
Desizaun : Pena prizaun tinan 2 suspende ba tinan 2

Iha 17 Maiu 2023, Tribunál Judisiál Primeira Instánsia Suai prezide julgamentu leitura akordaun ba krime kontra bandu ne'ebé envolve arguidu Luis Santos Ramos hasoru Estado RDTL, iha Munisípiu Bobonaro.

Akuzasaun prokuradór

Prokuradór akuza katak iha 1 Jullu 2022, iha oras tuku 10:00 dadeer, arguidu kontaktu ho ema Indonézia Atambua hatama mina Gajoel jerigen 10 kada jerigen 35 litrus liu husi dalan illegal, arguidu sosa kada jerigen ho valor osan US\$27.00 no jerigen 10 ne'e total hamutuk US\$270.00. Konsekuensia husi arguidu ninia hahalok hamosu prejuizu ba estadu.

Prokuradór akuza arguidu kontra artigu 316 KP kona-ba krime kontra bandu ho moldura penál tinan 2 too tinan 6 ka multa.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu deklar katak sosa mina atu ense ba ninia kareta de'it laos atu halo bisnis, arguidu arrepende ona ninia hahalok, depoisde akontesimentu ne'e lahatama ona mina liuhusi dalan illegal, foin mak mai hatan iha tribunál.

Alegasaun finál

Prokuradór, haktuir katak arguidu ninia aktu provadu no presidente tuir faktu iha akuzasaun, prokuradór haree katak krime kontra bandu ne'e aas tebes nune'e atu prevene krime refere husu ba tribunál atu kondena arguidu ho pena prizaun.

Enkuantu defeza haktuir katak, iha julgamentu ne'e arguidu arrepende ona ninia hahalok no depoisde akontesimentu ne'e arguidu lahatama mina liu husi dalan illegal no foin mak mai hatan iha tribunál, tanba ne'e husu ba tribunál atu aplika pena multa ba arguidu.

Desizaun

Depoisde avalia faktu sira hotu, tribunál prova katak arguidu hatama sasan ilegalmente, arguidu mós la iha karta lisensa ba inportasaun esportasaun.

Bazeia ba faktu provadu sira ne'e no tetu mós sirkunstánsia atenuante no agravante katak arguidu foin mak mai hatan iha tribunál no depoisde akontesimentu arguidu la halo aktividade illegal, maibé haree ba krime kontra bandu ne'e aas tebes iha área fronteira sira, nune'e atu halo prevensaun ba krime ne'e, tribunál konklui no kondena arguidu ho pena prizaun tinan rua suspende ba tinan rua.

5. Krime ofensa ba integridade física simples ho natureza violénsia doméstika

Nú. Prosesu : 0001/23.ANHTB
Kompozisaun Tribunál : Singulár
Juis : Dra. Patricia de Araújo F. B. M Xavier
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 17 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu NdJ hasoru nia feen, iha Munisípiu Ainaro.

Akuzasaun prokuradór

Prokuradór akuza katak iha 17 Janeiru 2023, iha oras tuku 9:00 dadeer, arguidu rakut dala rua iha lezada nia fuuk no tuku dala rua iha lezada nia hasan parte karuk no tuku dala rua iha lezada nia reen-toos. Antes agresau ne'e, arguidu ho lezada diskute malu kona-ba arguidu atu kous sira nia oan tanba sira nia oan buka nia aman, maibé arguidu lakohi, nune'e mosu agresau ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa totálmente ba faktu sira iha akuzasaun no deklarata katak foin mak primeiravés mai hatan iha tribunál, arrepende ona ninia hahalok, di'ak malu ona ho lezada no promete sei la komete tan krime hanesan iha futuru.

Depoisde rona deklarasaun arguidu nian, prokuradór husu ba tribunál atu presinde deklarasaun husi lezada tanba arguidu konfesa faktu integralmente. Kona-ba pedidu ne'e, defeza laiha opozisaun. Tribunál bazeia ba pedidu refere, presinde audisaun ba lezadu nia deklarasaun.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, prokuradór haktuir liután katak haree katak mezmú sira di'ak malu ona maibé krime violénsia doméstika aas tebes nune'e husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak, iha julgamentu arguidu konfesa, arrepende ona nia hahalok, foin primeiravés mai hatan iha tribunál no di'ak malu ona ho lezada, tanba ne'e husu ba tribunál atu kondena arguidu ho pena multa tuir arguidu nia kapasidade ekonomia.

Desizaun

Depoisde avalia faktu hotu, tribunál prova katak arguidu rakut dala rua iha lezada nia fuuk no tuku dala rua iha lezada nia hasan parte karuk no tuku dala rua iha lezada nia reen-toos.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál, nune'e tribunál konklui prosesu no kondena arguidu ho pena prizaun fulan tolu suspende ba tinan ida.

6. Krime ofensa ba integridade fízika simples ho natureza violénsia doméstika

Nú. Prosesu : 0021/22.MFMFI
Kompozisaun Tribunál : Singulár
Juis : Dra. Patricia de Araújo F. B. M Xavier
Prokuradór : Dr. Nelson J. S Magno
Defeza : Dr. Jonas Henrique da Costa
Desizaun : Pena prizaun fulan 3 suspende ba tinan 1

Iha 23 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AFS hasoru nia feen, iha Munisípiu Manufahe.

Akuzasaun prokuradór

Prokuradór akuza katak iha 20 Novembru 2022, iha oras tuku 16:00 lokraik, arguidu kaer lezada nia liman riba ba rai, depois tuur iha lezada leten, sama metin lezada nia ain parte karuk no sama metin mós lezada nia liman parte loos no tuku dala ida iha lezada nia matan parte loos no tuku dala iha lezada nia reen-toos no tuku mós dala barak iha lezada nia tilun hun parte karuk no loos. Antes agresaun ne'e, arguidu ho lezada diskute malu kona-ba lezada haruka arguidu buka serbisu atu sustenta nesesidade uma laran maibé arguidu hatan dehan atu ba Dili, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu balun loos no balun la loos, arguidu deklara katak iha akontesimentu ne'e arguidu atu buka serbisu iha Dili, maibé lezada subar arguidu nia karta kondusaun, nune'e arguidu ho lezada diskute malu, lezada mak tuku uluk dala ida iha arguidu nia hirus matan sente moras, nune'e arguidu basa dala ida iha lezada nia hasan parte karuk, kona-ba faktu sira seluk ne'e la loos hotu, arguidu arrepende baku feen ne'e ladi'ak, foin mai hatan iha tribunál no promete sei larepete ninia hahalok ne'e iha futuro.

Alende ne'e, lezada kontinua konfirma faktu hotu iha akuzasaun no deklara katak antes akontesimentu arguidu mós baku lezada, maibé lezada la apresenta keixa no agora dadaun moris separa ona ho arguidu.

Alegasaun finál

Prokuradór haktuir katak, mezmua iha julgamentu arguidu konfesa parsialmente ba faktu sira iha akuzasaun, maibé iha parte seluk lezada kontinua konfirma faktu sira iha akuzasaun, nune'e prokuradór konsidera arguidu provadu komete krime hasoru lezada. Tanba ne'e husu ba tribunal atu kondena arguidu ho pena prizaun tinan tinan ida suspende ba tinan ida.

Entretantu defeza haktuir katak defeza deklara deit faktu ne'ebé arguidu komete, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuro. nune'e husu ba tribunál atu kondena arguidu ho pena ne'ebé adekuadu.

Desizaun

Depoide avalia faktu hotu, tribunál prova katak arguidu kaer lezada nia liman riba ba rai, depois tuur iha lezada leten, sama metin lezada nia ain parte karuk no sama metin mós lezada nia liman parte loos no tuku dala ida iha lezada nia matan parte loos no tuku dala iha lezada nia reen-toos no tuku mós dala barak iha lezada nia tilun hun parte karuk no loos.

Bazeia ba faktu provadu sira ne'e no tetu mós ho sirkunstánsia atenuante sira hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

7. Krime ofensa ba integridade física simples ho natureza violéncia doméstika

Nú. Prosesu : 0015/21.ANANV
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 24 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu JV hasoru nia feen, iha Munisípiu Ainaro.

Akuzasaun prokuradór

Prokuradór akuza katak iha 27 Jullu 2021, iha oras tuku 7:30 dadeer, arguidu tuku dala rua iha lezada nia kotuk laran no tuku dala ida iha lezada nia tilun hun parte karuk rezulta lezada sofre moras. Antes agresauun ne'e, arguidu ho lezada diskute malu kona-ba asuntu nesesidade uma laran nian, nune'e mosu agresauun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ona nia hahalok, di'ak malu ona ho lezada no promete sei la repete tan krime hanesan iha futuru.

Alende ne'e, lezada kontinua konfirma faktu hotu iha akuzasaun no konfirma mós ho arguidu ninia deklarasaun katak depoisde akontesimentu ne'e sira di'ak malu ona no arguidu la komete ona krime hasoru lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós husi lezada, nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu kondena arguidu ho pena ne'ebé adekua ho konsiderasaun katak arguidu konfesa arrepende ona nia hahalok, diak malu ona ho lezada no promete sei la komete tan krime hanesan iha futuru.

Desizaun

Depoisde avalia faktu sira hotu, tribunál prova katak arguidu tuku dala rua iha lezada nia kotuk laran no tuku dala ida iha tilun hun parte karuk rezulta moras no bubu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok no promete sei la komete tan krime hanesan iha futuru.

8. Krime ofensa ba integridade fízika simples ho natureza violénsia doméstika

Nú. Prosesu : 0085/22.BBMLV
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Jonas Henrique da Costa
Desizaun : Pena prizaun fulan 3 suspende ba tinan 1

Iha 25 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MdJO hasoru nia feen JA, iha Munisípiu Bobonaro.

Akuzasaun prokuradór

Prokuradór akuza katak iha 31 Agostu 2022, iha oras tuku 19:00 kalan, arguidu tebe dala rua iha lezada nia kanotak no halo lezada monu ba rai, arguidu kontinua tuku dala ida iha lezada nia matan okos parte karuk rezulta moras no kanek. Antes agresaun ne'e, arguidu ho lezada diskute malu kona-ba bainhira arguidu ho lezada ba treinu arte marsias no arguidu haree ba kalan ona nune'e arguidu ho lezada atu fila ba uma, maibé treinador hatete ba arguidu katak "*ó fila uluk orsida mak ami lori ó nia feen ba uma*", bainhira lezada too iha uma arguidu halo kedas agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak arrepende ona nia hahalok no promete sei la komete tan krime hanesan iha futuru no foin primeiravés mai hatan iha tribunál.

Depoisde rona deklarasaun arguidu nian, prokuradór husu ba tribunál atu presinde deklarasaun husi lezada, tanba arguidu konfesa faktu integralmente. Kona-ba pedidu ne'e, defeza laiha opozisaun. Tribunál bazeia ba pedidu refere, presinde audisaun ba lezadu nia deklarasaun.

Alegasaun finál

Prokuradór, haktuir katak arguidu provadu no presidente tuir faktu sira konsta iha akuzasaun, prokuradór haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza iha nia alegasaun haktuir katak iha perante julgamentu arguidu konfesa, arrepende ona ninia hahalok no depoisde akontesimentu ne'e arguidu la komete ona krime seluk hasoru lezada. Tanba ne'e husu ba tribunál atu aplika pena ne'ebé adekua ba arguidu.

Desizaun

Depoisde avalia faktu sira hotu, tribunál prova katak arguidu tebe dala rua iha lezada nia kanotak no halo lezada monu ba rai, arguidu kontinua tuku dala ida iha lezada nia matan okos parte karuk rezulta moras no kanek.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

9. Krime ofensa ba integridade fízika simples ho natureza violénsia doméstika

Nú. Prosesu : 0024/21.BBMLV
Kompozisaun Tribunál : Singulár
Juis : Dr. Nasson Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 26 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MGH hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 20 Maiu 2021, iha oras tuku 12:00 meiodia, arguidu lori kadeira masa nia ain hodi baku dala ida iha lezada nia ulun no baku dala ida iha lezada nia ain parte karuk rezulta moras no kanek. Antes agresaun ne'e, arguidu priense hela formulariu 12 Novembru nian no arguidu priense mós oan nain rua husi kaben primeiru nian hotu, maibé lezada rezeita no lakohi, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu mós deklara katak arrepende ona nia hahalok, depoisde akontesimentu di'ak malu ona ho lezada no foin primeiravés mai hatan iha tribunál.

Alegasaun finál

Prokuradór haktuir katak, arguidu provadu no presidente tuir faktu sira iha akuzasaun, mezmu sira di'ak malu ona, maibé haree ba krime violénsia doméstika ne'ebé aas tebes,

nune'e atu halo prevensaun ba krime refere husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak, argudu konfesa, arrepende ona ninia hahalok no depoisde akontesimentu ne'e sira di'ak malu fali no foin primeiravés mai hatan iha tribunál, tanba ne'e husu ba tribunál atu aplika pena multa ba arguidu tuir arguidu nia kapasidade finanseira.

Desizaun

Depoisde avalia faktu hotu, tribunál prova katak arguidu lori kadeira masa nia ain hodi baku dala ida iha lezada nia ulun no baku dala ida iha lezada nia ain parte karuk rezulta moras no kanek.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

10. Krime ofensa ba integridade fizika simples ho natureza violénsia doméstika

Nú.Prosesu : 0005/22.MFMFI
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 29 Maiu 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ABdC hasoru nia feen, iha Munisípiu Manufahe.

Akuzasaun prokuradór

Prokuradór akuza katak iha 31 Marsu 2022, iha oras tuku 8:00 dadeer, arguidu tuku dala rua iha lezada nia liman parte karuk no tuku dala ida iha lezada nia kotuk laran rezulta moras no bubu. Antes agresaun ne'e, lezada atu habai esponza iha liur maibé arguidu hatete ba lezada katak labele habai, orsida oras tuku 9:00 mak habai, hafoin lezada tama ba uma laran foti espiker tuda ba iha liur. Ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak baku feen ne'e ladi'ak no promete iha futuru sei la repete ninia hahalok ne'e iha futuru, foin mak mai hatan iha tribunál no arrepende ona ninia hahalok.

Alende ne'e, lezada kontinua konfirma faktu hotu iha akuzasaun no deklara katak depoisde akontesimentu ne'e sira di'ak malu kedas no to'o ohin loron arguidu la baku ona lezada, lezada mos perduo ona arguidu.

Alegasaun final

Prokurador haktuir katak, arguidu konfesa no konfirma husi lezada, mezmu sira di'ak malu ona maibe atu prevene krime violensia domestika ne'ebe aas tebes, husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak, arguidu konfesa, arrepende ona ninia hahalok no depoisde akontesimentu ne'e arguidu la halo tan krime hasoru lezada, alende ne'e arguidu mos iha ekonomia suficiente, tanba ne'e husu ba tribunál atu kondena arguidu ho pena multa.

Desizaun

Depoisde avalia faktu sira hotu, tribunál prova katak arguidu tuku dala rua iha lezada nia liman parte karuk no tuku dala ida iha lezada nia kotuk laran rezulta moras no bubu.

Bazeia ba faktu provadu sira ne'e no tetu mos ho sirkunstansia atenuante sira hanesan arguidu konfesa, arrepende ona nia hahalok, diak malu ona ho lezada, nune'e tribunál konklui prosesu no kondena arguidu ho pena prizaun fulan tolu suspende ba tinan ida.

11. Krime ofensa ba integridade fizika simples ho natureza violensia domestika

Nú. Prosesu : 0071/22.PDSUA
Kompozisaun Tribunál : Singulár
Juis : Dr. Samuel da Costa Pacheco
Prokurador : Dr. Nelson J. S. Magno
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 31 Maiu 2023, Tribunál Judisiál Primeira Instansia Suai prezide julgamentu leitura sentensa ba krime ofensa ba integridade fizika simples ho natureza violensia domestika ne'ebe envolve arguidu AdO hasoru nia feen MG, iha Munisípiu Covalima.

Akuzasaun prokurador

Prokurador akuza katak iha 13 Abril 2022, iha oras tuku 11:00 dadeer, arguidu tuku dala ida ho maka'as iha lezada nia hirus matan rezulta moras.

Tuir mai iha 15 Maiu 2022, iha oras tuku 12:00 meiodia, arguidu tuku dala ida ho maka'as iha lezada nia liman sikun parte karuk, rezulda moras maka'as. Antes agresaun ne'e arguidu ho lezada diskute malu kona-ba arguidu amante (*selingku*) ho feto seluk no lezada tolok arguidu nia amante, ho nune'e mosu agresaun ne'e.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklarata katak depoisde akontesimentu ne'e di'ak malu fali ona ho lezada, arguidu arrepende ona ninia hahalok katak baku feen ne'e ladi'ak no arguidu foin mak primeiravés mai hatan iha tribunál.

Alende ne'e, lezada kontinua konfirma faktu hotu iha akuzasaun no deklarata katak depoisde akontesimentu di'ak malu fali ona ho arguidu.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mos husi lezada, nune'e atu prevene krime ne'e akontese tan iha futuru, tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Enkuantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende ona nia hahalok di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu sira, tribunál prova katak iha 13 Abril 2022, arguidu tuku dala ida ho maka'as iha lezada nia hirus matan rezulta moras no iha 15 Maiu 2022, arguidu tuku dala ida ho maka'as iha lezada nia liman sikun parte karuk

Bazeia ba faktu provadu sira ne'e tetu mós ho sirkunstánsia atenuante sira hanesan arguidu konfesa, arrepende ona nia hahalok, diak malu ona ho lezada no foin primeiravés mai hatan iha tribunál. Ho nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>